

# JCorp anjur program Kembali ke Sekolah

➔ Bantu pelajar kurang mampu buat persiapan

**Oleh Nurul Amanina Suhaini**  
bhjb@bh.com.my

✦ Kota Tinggi

Johor Corporation (JCorp) meneruskan program Jalinan Ukhuwah dengan meraikan 100 murid Sekolah Kebangsaan (SK) LKTP Sungai Mas dan SK Bandar Mas, dekat sini, yang kurang berkemampuan membuat persiapan sesi persekolahan 2017.

Program tanggungjawab sosial korporat (CSR) Kembali ke Sekolah itu diadakan di Felda Sungai Mas, dekat sini.

Timbalan Pengurus Besar, Jabatan Pembangunan Bisnes JCorp,

Shamsulbahri Md Dali, berkata Program Jalinan Ukhuwah itu digerakkan oleh Divisyen Tanggungjawab Korporat menerusi Waqaf An-Nur Corporation Berhad dan Jabatan Bisnes Amal.

Katanya, program itu menjadi antara platform bagi JCorp dan semua pekerjaannya untuk bersama-sama mendekati dan berbakti kepada masyarakat.

## Dampingi masyarakat

"Program yang diperkenalkan sejak awal tahun 2014 ini menjadi antara inisiatif JCorp bagi mendampingi masyarakat dengan kerjasama jawatankuasa penyelaras mukim di semua dewan undangan negeri (DUN) Johor," katanya.

Beliau berkata demikian ketika



**Antara peserta yang menjayakan program Jalinan Ukhuwah dan Bantuan Kembali ke Sekolah yang diadakan di Felda Sungai Mas, Kota Tinggi.**

berucap pada majlis perasmian program Jalinan Ukhuwah, dekat sini.

Yang turut hadir, Ahli Dewan Undangan Negeri (ADUN) Penawar, Hamimah Mansor dan Pengerusi Jawatankuasa Penyelaras Program Jalinan Ukhuwah JCorp, Shahruni Aslam.

Pada majlis berkenaan, setiap penerima mendapat sumbangan wang tunai bernilai RM100, selain barangan keperluan harian dan kelengkapan persekolahan.

Pelbagai aktiviti menarik diadakan termasuk pemeriksaan kesihatan percuma, gotong-royong mengecat bangunan dan pentas di Wisma Jawatankuasa Kemajuan dan Keselamatan Kampung (JKKK) FELDA Sungai Mas, membersihkan

## Fakta nombor

# 100 PENERIMA

dari SK LKTP Sungai Mas dan SK Bandar Mas, Kota Tinggi

# RM100 TUNAI

serta barangan kelengkapan persekolahan setiap pelajar

kawasan sekitar bangunan wisma dan taman permainan, selain mengecat tiang kawasan pejalan kaki di SK LKTP Sungai Mas.

Sepanjang tahun ini, sebanyak 10 siri program Jalinan Ukhuwah dilaksanakan di Johor termasuk program Semarak Jawi dengan semua program diadakan bertujuan mendekati pemimpin masyarakat dan komuniti sehingga ke akar umbi.

Shamsulbari berkata, JCorp diberi mandat oleh kerajaan negeri bagi mentadbir urus pihak berkuasa tempatan (PBT) Pengerang mulai 1 Januari depan yang melibatkan lima mukim iaitu Sedili Kecil, Pantai Timur, Tanjung Surat, selain Johor Lama dan Pengerang.